



UMGAQO-SISEKO

WERIPHABLIKHI YOMZANTSİ-AFRIKA KA-1996

Intshayelelo, Okusisiseko no Mqulu wamalungelo



UMGAQQ-SISEKO

WERIPHABLIKHI YOMZANTSİ-AFRIKA KA-1996

Intshayelelo, Okusisiseko no Mqulu wamalungelo

iPrintwe yiConstitutional Court Trust ngo 2024 ukuze ikhaphe iimiboniso yeConstitutional Court Art Collection (CCAC). Lencwadi yenzelwe ukukhapha iimiboniso ye CCAC xa ihamba ekuhlaleni naphesheya ihlabela iminyaka eyi 30 yenkululeko ngo 2024, iminyaka eyi 30 ye CCAC ngo 2025 neminyaka eyi 30 yomgaqq siseko ngo 2026.



Lencwadana iyafumaneka kwi webhusayithi ye CCAC ngolwimi IwesiXhosa, ngesiNgesi namnye amalwimi waseMzantsi Afrika. Skena leQR code okanye udwendwele ikhonkco le webhusayithi ye CCAC ukuze ufumane lencwadana ukuze ufunde lukhulu ngeqokelelo nemiboniso yokuambahamba: <https://ccac.concourtrust.org.za/travelling-exhibition>

CCAC 30 YEARS OF DEMOCRACY - 2024
30 YEARS OF THE CCAC - 2025
30 YEARS OF THE CONSTITUTION - 2026



Aba ngaba ncedisileyo ngokwe ngalelo lwemali ukuze kwenzeke kuPrintwe lencwadi, abaphinde babenogalelo ngomsebenzi we CCT:

Ford Foundation



Mellon Foundation

INSTITUT FRANÇAIS
Afrique du Sud



Kingdom of the Netherlands

Isingeniso siguqulwe kwisingesi ngu: Buntu Makhedama
Onegalelo ngoguqla: Thandolwethu Jele (CCSA law clerk)

MALUNGA NE CCAC

iConstitutional Court Art Collection ngumbonelo bu gcisa we nkundla yomgaqo siseko ephakamileyo eMzantsi Afrika. Ubugcisa bayo buhlukaniswe ka bini ngoba kube khona iintlobo zobugcisa ezidityaniswe nesakhiwo se nkundla yomgaqo siseko ephakamileyo, kube khona ubugcisa obuphakamisekayo ukuze buqaqambise iindawo ezohlukileyo kwiNkudla yomgaqo siseko. Ubugcisa bokuqala bafika ngo1995 ize kube kuba khona iCCAC, kwaye olu luqokelelo olukhulayo olu nobugcisa obungapha kwe khulu. iCCAC iyayi khuthaza imfundu, ingxoxo kwakunye nophando loku tyebisa indima yomgaqo siseko neNkudla yomgaqo siseko ephakamileyo eMzantsi Afrika.

iCCAC iphuhlisa kwaye inikezelala ngeendlela zokuqonda nokuphicotha imixholo ehabisana nenguuko, ubulungisa kwezentlalo, amalungelo oluntu, umgaqo siseko, nobuqu, okusingqongileyo, ubulungisa noxolelwano eMzantsi Afrika jikelele. Ngokwe ndima yoku veza umoya womgaqo siseko, iCCAC inyanelisa umanyano lweeNtlanga kwi sakhiwo se nkundla yomgaqo siseko ephakamileyo eMzantsi Afrika.

iCCAC lilungu le Constitutional Court Trust (CCT). iCCT isulungwe ngeenjongo zokukhuthaza nokuphuhlisa amalungelo woluntu, ukulawula komthetho, ezomthetho ezizimeleyo kwi ngingqi yaseMzantsi Afrika, ikakhulu umgaqo siseko.

MALUNGA NOMFANEKISO WOKOGQUMA

Ezi ziintsika ezikekeleyo kwi foyer yenkudla yomgaqo siseko ezingumfanekiso obonisa imithi kwaye zihonjiswe ngeentanga ze mosaic ezinamatshungu azo. Ezi zakhiwo zicacisa umbono wokubamba inkundla phantsi ko mthi, ekhuthaza ukuthatha kwe nxaxheba ekuyindlela yasembo yoku nyanelisa umthetho emzantsi Afrika; apho abantu abadala bachopha phantsi ko mthi ize bashukuxe iingxaki abajongana nazo.

Umgcisi: Carolyn Parton. **Abanegalelo:** Nandipha Baduza, Sandile Cele, Alvina Chonco, Zama Dunywa, Paul Figuero, Raksha Gobardan, Thando Mama, Vukani Mpanza, Tanja van Zyl.

Ifotwe ngu: Ben Law-Viljoen © CCT

MALUNGA NOMBHALO WOBUSO BE SIZWE

Lona umbhalo wokhiwa ngu Garth Walker ngo 2004 ewenzela inkundla yomgaqo siseko. Lombhalo esiwubiza ngobuso besizwe wakhiwa ngenxa yokukhuthazwa kukubona imibhalo yesakhilo sase Hillbrow. Lemibhalo ayibonayo kwaku ziziibongo ezazi krwelwe kwiminyango yentilongo nemibhalo yo rhulumente wocalucalulo. Lemibhalo yathathwa ngokuba imele imvelaphi yobumi beNkundla yomgaqo siseko. Ngexesha uWalker esokha lombhalo wasose wacaphula kwiindlela zokubhala zaba GWEBI bokujala beNkundla ye nkululeko. Lombhalo uyabonakala kwi phaneli yesamente ephezulu xa ungena emnyango wase wenkundla yomgaqo siseko. Lombhalo uthetha gabalala nge braille nangamalwini alishumi elinanye ase Mzantsi Afrika ngexabiso lokuba ngumntu, inkululeko nokulingana. Lombhalo esiwubiza ngobuso besizwe waziwa njengomzekelo womgaqo siseko odlala indima yokuba ngumkhomba ndlela wenkundla yomgaqo siseko kwakunye nemibhalo ekuyo.

MALUNGA DALE NCWADI

iCCAC ikhanyisa iindawo ngeendawo zomgaqo siseko ngakumbi intshayebolelo, okusisiseko umqulu wamalungelo zonke zixutyiwe kule ncwadi. Okuqulethwe ngumgaqo siseko kubhalwe ngoku pheleleyo kwaye lomgaqo siseko uyafumaneka kwiindawo ze intha-nethi:

🔗 <https://www.justice.gov.za/constitution/pdf.html>

IZAHLUKO ZOMGAQO SISEKO

INTSHAYELELO

ISAHLUKO 1: Okusisiseko

ISAHLUKO 2: Umqulu wamalungelo

ISAHLUKO 3: Urhulumente Wentsebenziswano

ISAHLUKO 4: IPalamente

ISAHLUKO 5: UMongameli Norhulumente Wezwelonke

ISAHLUKO 6: Amaphondo

ISAHLUKO 7: Urhulumente Wasekuhlaleni

ISAHLUKO 8: linkundla Nokusingathwa Kobulungisa

ISAHLUKO 9: Amaziko Karhulumente Axhasa Intando Yesininzi

YoMgaqo-siseko

ISAHLUKO 10: Imisebenzi Yolawulo Karhulumente

ISAHLUKO 11: linkonzo Zokhuseleko

ISAHLUKO 12: linkokeli Zomthonyama

ISAHLUKO 13: limali

ISAHLUKO 14: Izibhalo eziquka konke

ISHEDYULI 1-6: Izandisi notshintsho

UMFANEKISO OSISHWANKATHLEO

UMGAQO-SISEKO

WERIPHABLIKHI YOMZANTSİ-AFRIKA KA-1996

[Njengoko wathi wamkelwa ngoMeyi 8, 1996 waza wenziwa utshintsho
ngo-Oktobha 11, 1996 yiNdlu yoQulunqo-Mgaqo-siseko]

Umbhalo wesingisi usayinwe nguMongameli
Yavunywa ngomhla we 16 kwiNyanga yoMnga 1996

Ngokwazisa Umgaqo-Siseko omtsha weRiphablikhi yoMzantsi-
Afrika nokupuhhlisa imixholo ngokuzenzekelayo.

OKUQUELTHWEYO

Intshayelelo	8	
Isahluko 1	Okusisiseko	9
Isahluko 2	Umqulu wamalungelo	12

INTSHAYELELO

Thina, bantu baseMzantsi-Afrika,

Siyaziqonda iintswela-bulungisa zexesha elidlulileyo;

Sibothulel' umnqwazi abo baye bev' ubunzima ukuze kubekho
ubulungisa nenkululeko elizweni lethu;

Siyabahlonela abo baye basebenzela ukwakha nokuphucula ilizwe lethu;
kwaye

Sikholelwa kwelokuba uMzantsi-Afrika ngowabo bonke abahlala kuwo,
bemanyene nangona bengafani.

Ngoko ke, ngabameli bethu abanyulwe ngokukhululekileyo, samkela lo
Mgaqo-siseko njengo-mthetho owongamileyo weRiphablikhi ukuze—

Kungcibeke imisantsa yexesha elidlulileyo, kwakheke noluntu
lwentando yesininzi, ubulungisa basentlalweni namalungelo oluntu
asisiseko;

Kwandlalwe iziseko zoluntu lwentando yesininzi nolukhululekileyo
apho urhulumente engowentando yabantu kwaye ummi ngamnye
ekhuselwe ngumthetho ngokulinga-nayo nabanye;

Kuphuculwe umgangatho wobomi wabo bonke abemi, kukhululwe
nomntu ngamnye afikelele kwelona nqanaba anokufikelela kulo
lobuchule bakhe; kananjalo

Kwakhewe uMzantsi-Afrika omanyeneyo wentando yesininzi
okwaziyo ukuthabatha indawo yawo onelungelo layo njengelizwe
elizimeleyo kusapho phakathi kwamanye amazwe.

Ngamana uThixo angabakhusela abantu bakowethu.

Nkosi Sikelel' iAfrika. Morena boloka setjhaba sa heso. God seën Suid-
Afrika. God bless South Africa. Mudzimu fhatutshedza Afurika. Hosi
katekisa Afrika.

ISAHLUKO 1

IZISEKO

1. *IRiphablikhi yoMzantsi-Afrika*

IRiphablikhi yoMzantsi-Afrika ililizwe elinye, elizimeleyo, lentando yesinanzi elisekelwe koku kulandelayo:

- 1) sokuba ngumntu, ukufikelela ekulinganeni kwabantu bonke nokukhuthazwa kwamalungelo oluntu neenkululeko omalube nazo;
- 2) ukungacaluli ngokobuhlanga nangokobuni;
- 3) ukongama koMgaqo-siseko nokulawula komthetho;
- 4) ilungelo lokuvota kwabo bonke abantu abadala, umqulu wabavoti omnye wezwelonke, unyulo olubakho rhoqo nenkqubo yamaqela amaninzi opolitiko yorhulumente wesinanzi, ukuqinisekisa uxanduva lokuphendula, ukusabela nokusebenzela elubala.

2. *Ukongama koMgaqo-siseko*

Lo Mgaqo-siseko ungumthetho owongamileyo weRiphablikhi; umthetho okanye ukwenza okungavisaniyo nawo kuphuthile kwaye iimbopheleleko ezifunwa nguwo mazifezekiswe.

3. *Ubumi*

- 1) Wonke umntu waseMzantsi-Afrika ungummi.
- 2) Bonke abemi-
 - a. banamalungelo ngokulinganayo okuxhamla kumalungelo, kwiinyhweba neenzozo zokuba ngummi; kwaye
 - b. banoxanduva ngokulinganayo lokufeza iimbopheleleko noxanduva lokuba ngummi.
- 3) Imithetho yepalamente yezwelonke mayithethe ngokuzuzwa kobumi, ngokulahlekelwa bubo nangokubuyiselwa kwabo.

4. Umhobe Wesizwe

NguMongameli owenza isiggibo ngomhobe wesizwe weRiphablikhi ngokwenza isihlokomiso.

5. Iflegi yelizwe

Iflegi yelizwe yeRiphablikhi ingumbala omnyama, nagolide, naluhlaza, namhlophe, nabomvu, naluhlaza okwesibhakabhaka, njengoko ichazwe kwaye yazotywa kwiSihlomelo 1.

6. Iilwimi

- 1) Iilwimi zaseburhulumenteni zeRiphablikhi siSepedi, neSesotho, neSetswana, neSiswati, nesiVenda, nesiTsonga, nesiBhulu, nesiNgesi, nesiNdebele, nesiXhosa, nesiZulu.
- 2) Ngokuqonda imeko yeelwimi zomthonyama zabantu bakowethu nembali yazo yokuncitshiswa kokusetyenziswa kwazo, urhulumente makathabathe amanyathelo asebenzisekayo naqinisekileyo okuphakamisa umgangatho wezi lwimi aze akhuthaze ukusetyenziswa kwazo.
- 3) a. Urhulumente wezwelonke noorhulumente bamaphondo banokusebenzisa naziphi na iilwimi zaseburhulumenteni, bezisebenzisela imisebenzi yoburhulumente, becingela ukusetyenziswa kwazo, ukusebenziseka kwazo, indleko yokuzisebenzisa, iimeko zengingqi neemfuno zoluntu noko kukhethwa luluntu lulonke okanye kwiphondo elo; kodwa yena urhulumente wezwelonke kune norhulumente ngamnye wephondo makasebenzise ubuncinane iilwimi ezimbini zaseburhulumenteni.
b. Oomasipala mabacingele ukusetyenziswa kweelwimi ngabahlali kune noko kukhethwa ngabo.

- 4) Urhulumente wezwelonke noorhulumente bamaphondo mabathi, ngokuwis' imithetho nangezinye iindlela, bakulawule kwaye bakubek' esweni ukusetyenziswa kweelwimi zabo zaseburhulumenteni. Kungekuko ukuba kuyaphambukwa koko kutshivo kwisiqendwana (2), zonke iilwimi zaseburhulumenteni mazixatyiswe ngokulinganayo kwaye maziphathwe ngokungakhwinisiyo.
- 5) IBhodi Yeelwimi YaseMzantsi-Afrika esekwe ngumthetho wepalamente wezwelonke-
- a. mayikhuthaze, kwaye idale iimeko, zokupuhhliswa nokusetyenziswa-
 - i) kwazo zonke iilwimi zaseburhulumenteni;
 - ii) kulwimi lwamaKhoi, nolwamaNama nolwamaSan; kunye
 - iii) nolwimi lwezandla; kananjalo
 - iv) ikhuthaze ize iqinisekise ukuhlonelwa-
 - v) kwazo zonke iilwimi ezisetyenziswa ngokuqhelekileyo ngabantu ngabantu eMzantsi-Afrika, kuquka nesiJamani, nesiGrike, nesiGujarati, nesiHindi, nesiPhuthukezi, nesiTamil, nesiTelegu nesiUrdu; kunye
 - vi) nesiArabhu, nesiHebhere, nesiSanskrit kunye nezinye iilwimi ezisetyenziselwa ukunqula eMzantsi-Afrika.

ISAHLUKO 2

UMQULU WAMALUNGELO

7. Amalungelo

- 1) Lo Mqulu wamaLungelo utilitye lembombo lentando yesinini eMzantsi-Afrika. Uqulethe amalungelo abo bonke abantu elizweni lethu kwaye uqinisekisa sokuba ngumntu, ukulingana nenkululeko yentando yesinini.
- 2) Urhulumente makawahlonele, awakhusele, awakhuthaze kwaye awafezekise amalungelo akuMqulu wamaLungelo.
- 3) Amalungelo akuMqulu wamaLungelo anokuthi asikelwe umda lusikelo-mdla olukwisiqendu 36, okanye olukwenye indawo kuMqulu.

8. Ukusebenza kwavo

- 1) UMqulu wamaLungelo usebenza kuwo wonke umthetho, kwaye unkqamangela abawisi-mthetho, urhulumente, iinkundla nawo onke amacandelo karhulumente.
- 2) Okutshiwo kuMqulu wamaLungelo unkqamangela umntu okanye inkampani, ukuba kuyasebenza kuyo, kuxhomekeke nasekubeni kusebenza kangakanani, kucingelwa ubunjani belungelo nobunjani boxanduva oluza nelungelo elo.
- 3) Xa isebeenzisa okutshiwo nguMqulu wamaLungelo kumntu okanye kwinkampani ngokwesiqendwana (2), inkundla-a.
 - a. ukuze iphumeze ilungelo elikuMqulu, mayisebeenzise, okanye ukuba kuyimfuneko, iphuhlise umthetho wohlobo olungabhalwanga phantsi, xa umthetho wepalamente wona ungalifezekisi elo lungelo; kwaye
 - b. isenokupuhlisa imigaqo yomthetho wohlobo olungabhalwanga phantsi ukulisikel' umda ilungelo, kodwa kuxhomekeke ekubeni oko kusikelwa umda kuyavumelana kusinina nesiqendu 36(1).
 - c. Inkampani inelungelo lokuxhamla kumalungelo akuMqulu wamaLungelo kangangoko kufunwa bubunjani bamalungelo nabubunjani baloo nkampani.

9. *Ukulingana*

- 1) Bonkeabantu bayalingana phambi komthetho kwaye banelungelo lokukhuselwa ngokulinganayo ngumthetho nokuzuza ngokulinganayo kuwo.
- 2) Ukulingana kuquka ukuxhanyulwa okupheleleyo nokulinganayo kwavo onke amalungelo neenkululeko. Ngenjongo yokukhuthaza ukuba kulinganwe, kusenokuthatyathwa amanyathelo okuvis' umthetho namanye amanyathelo acetylwe ukukhusela okanye ukuphucula abantu, okanye iindidi zabantu, ezhlelelekileyo ngenxa yokucalulwa okungafanelekanga.
- 3) Urhulumente akavumelekanga ukuba athi, ngokungqalileyo okanye ngokungangqalanga, acalule nabani na ngenye yezi ndlela zilandelayo: ngokobuhlanga, ngokobuni, ngokukhulelwa, ngobume bomntu ngokwasemtshatweni, ngobuzwe okanye ngemvelaphi yakhe ngokwasentlalweni, ngebalala, ngotyekelo lwakhe ngokwesondo, ngobudala beminyaka, ngokugogeka, ngnqulo, ngesazela, ngenkolelo, ngenkcubeko, ngolwimi nangokuzalwa.
- 4) Akukho mntu uvumelekileyo ukuba acalule ngokungafanelekanga, ngokungqalileyo okanye ngokungangqalanga, ecalula omnye ngenye yezi ndlela zixelwe kwisiqendwana (3). Makuwiswe umthetho yipalamente yezwelonke ukuthintela ucalulo olungafanelekanga.
- 5) Ukucalula ngenye yezi ndlela zidweliswe kwisiqendwana (3) okanye ngeendlela eziliqela kwezo kukucalula okungafanelekanga ngaphandle kokuba kuveliswa izibakala ezibonisa ukuba olo calulo lufanelekile.

10. *Isidima sokuba ngumntu*

Wonk' ubani unesidima esingenakohluthwa nelungelo lokuba sihlonitshwe sakhe kwaye sikhuselw.

11. *Ubomi*

Wonk' ubani unelungelo lokuphila.

12. Inkululeko nokukhuseleka komntu

- 1) Wonk' ubani unelungelo lenkululeko nokukhuseleka, elibandakanya ilungelo-
 - a. lokuba angayohluthwa inkululeko ngokuzenzela nje, okanye kungekho sizathu sivakalayo;
 - b. lokuba angavalelw uhalala kungathethwa tyala;
 - c. lokuba angagonyamelwa nangaluphi na uhlobo, nokuba kukugonyamelwa ngamagosa aseburhulumenteni okanye ngabantu nje;
 - d. lokuba angangcungcuthekiswa nangayiphi na indlela; nelokuba
 - e. angaphathwa okanye ohlwaywe ngendlela ekhohlakeleyo, engenabuntu okanye ethob'.
- 2) Wonk' ubani unelungelo lokuba angenziwa nto emzimbeni nasengqondweni, eliquka ilungelo-
 - a. lokuzenzel' isigqibo mayela nokuzala;
 - b. lokukhuseleka komzimba wakhe nokuba ulawulwe nguye; nelokuba
 - c. kungenziwa ufuniselo lonyango okanye lobunzululwazi kuye ngaphandle kwemvume yakhe.

13. Ubukhoboka nomsebenzi wesinyanzelo

Akukho bani unokwenziwa ikhoboka okanye enziswe umsebenzi wesinyanzelo.

14. Ukuba neemfihlo

- Wonk' ubani unelungelo lokuba neemfihlo, eliquka ilungelo lokuba-
- a. angasetshwa emzimbeni okanye kungasetshwa umzi wakhe;
 - b. ingasetshwa impahla yakhe;
 - c. zingathathwa izinto zakhe; okanye
 - d. zingaphulaphulwa iincoko zakhe nabanye abantu.

15. Inkululeko yokunqula, yenkolelo noluvo

- 1) Wonk' ubani unelungelo lokwenza ngokwesazela sakhe, unenkululeko yokunqula, yokucinga, yokukholelwa, nokuba noluvo lwakhe.
 - 2) Unqulo lunokuqhutywa kumaziko karhulumente okanye kumaziko ancediswa ngurhulumente, kodwa kuxhomekeka ekuben-i
 - a. oko kunqula kulandela imigaqo eyenziwe ngabasemagunyeni abafanelekileyo;
 - b. kunqulwa ngendlela engakhalazisiyo; kwaye
 - c. ukubakho apho kusimahla kwaye kungokuzithandela.
 - 3) a. Esi siqendu asiyithinteli imithetho yepalamente-
 - i) eyamkelayo imitshato ekungenwe kuyo ngokwesithethe, okanye ngokwenkqubo yonqulo, okanye ngokwenkqubo yosapho; okanye
 - ii) eyamkela iinkqubo ekuqhutywa ngazo kusapho oluthile ngokwesithethe, okanye ngokwabantu bonqulo oluthile.
- b. Ukwamkelwa yimithetho yepalamente ngokwesiqendu (a) makuvisisane nokutshiwo kwesi siqendu nokunye okutshiwo nguMgaqo-siseko.

16. Inkululeko yokuthetha

- 1) Wonk' ubani unelungelo lenkululeko yokuthetha, eliqua-
 - a. inkululeko yamaphephandaba namanye amajelo eendaba;
 - b. inkululeko yokufumana ingombolo okanye ukunika abanye ingombolo okanye iingcamango;
 - c. inkululeko yokusebenzisa ubuchule bokuziqalela izinto;
 - d. nenkululeko yemfundo nenkululeko yophando kubunzululwazi.
- 2) Ilungelo elikwisiqendwana (1) aliquki-
 - a. ukuphemb' imfazwe;
 - b. ukuthundeza abanye ukwenz' ugonyamelo olukhawulezileyo; okanye
 - c. ukukhuthaza intiyo esekelwe kubuhlanga, ubuzwe, ubuni okanye unqulo, nekhuthaza ukwenzakalisa.

17. Ukuhlanganisana, ukuqhankqalaza, noxwebhu lwezikhalazo

Wonk' ubani unelungelo lokuhlanganisana nabanye, lokuqhankqalaza nelokudlulisa uxwebhu lwezikhalazo, ekwenza oko ngoxolo kwaye engaxhobanga.

18. Inkululeko yokuzibandakanya

Wonk' ubani unelungelo lokuzibandakanya ngokukhululekileyo.

19. Amalungelo opolitiko

- 1) Wonke ummi ukhululekile ukwenza ukhetho kopolitiko, okuquka ilungelo–
 - a. lokusungula umbutho wopolitiko;
 - b. lokuthabath' inxaxheba kwimisebenzi yombutho wopolitiko, okanye ukuwugayel' amalungu umbutho wopolitiko;
 - c. nokuphum' iphulo lombutho wopolitiko okanye iphulo lenjongo yopolitiko.
- 2) Wonke ummi unelungelo lonyulo olukhululekileyo, olungenamkhethenolubakho rhoqo lalo naliphi na iqumrhu lowiso-mthetho elisekwenengokoMgaqo-siseko.
- 3) Wonk' ummi ongumntu omdala unelungelo–
 - a. lokuvota kunyulo evotela naliphi na iqumrhu lowiso-mthetho elisekwenengokoMgaqo-siseko, ekwenza oko emfihlakalweni;
 - b. nelokuziggatsela isikhundla saseburhulumenteni aze, ukuba unyuliwe, angene aso.

20. Ubumi

Akukho mmi onokohluthwa ubumi.

21. Inkululeko yokuhamba-hamba nokuhlala

- 1) Wonk' ubani unelungelo lenkululeko yokuhamba-hamba.
- 2) Wonk' ubani unelungelo lokumka kwiRiphablikhi.

- 3) Wonk' ubani unelungelo lokungena kwiRiphablikhi, lokuqhubeka engaphakathi kuyo, nelokuhlala naphi na kuyo.
- 4) Wonk' ummi unelungelo lokuba nephaspothi.

22. Inkululeko yokurhweba, yokusebenza nokwenza umsebenzi ofundelweyo

Wonk' ummi unelungelo lokukhetha ngokukhululeka urhwebo alufunayo, umsebenzi okanye umsebenzi awufundeleyo. Urhweba, ukusebenza okanye ukwenza umsebenzi ofundelweyo kusenokuthi kulawulwe ng-umthetho.

23. Ubudlelane emisebenzini

- 1) Wonk' ubani unelungelo lokupathwa ngendlela engenamkhethe emsebenzini.
 - 2) Wonk' umsébenzi unelungelo-
 - a. lokusungula umbutto wabasebenzi nokuzimanya nawo;
 - b. lokuthabath' inxaxheba kwimisebenzi yombutto wabasebenzi nakwizicwangciso zayo;
 - c. nelokugwayimba.
 - 3) Wonk' umqeshi unelungelo-
 - a. lokusungula umbutto wabaqeshi nokuzimanya nawo;
 - b. nelokuthabath' inxaxheba kwimisebenzi yombutto wabaqeshi nakwizicwangciso zawo.
 - 4) Umbutto ngamnye wabasebenzi nombutto ngamnye wabaqeshi unelungelo-
 - a. lokwenz' iziggibo ngolawulo lwawo nezicwangciso zawo nemisebenzi yawo;
 - b. lokuququzelela;
 - c. nelokusungula umanyano uze uzibandakanye nalo.
 - 5) Umbutto ngamnye wabasebenzi, umbutto ngamnye wabaqeshi nomqeshi banelungelo lokubandakanya kwiingxoxo zokubonisana. Kunokuwisw' umthetho wezwelonke ngenjongo yokulawula iingxoxo

zokubonisana. Xa kunokuthi umthetho wepalamente ulisikel' umda ilungelo elikwesi Sahluko, oko kulisikel' umda makuvisisane nesiqendu 36(1).

- 6) Umthetho wepalamente wezwelonke usenokuthi uwamkele amalungiselelo okhuseleko ombutho wabasebenzi aqulethwe kwizivumelwano zendibaniselwano. Xa unokuthi umthetho owiswe yipalamente ulisikel' umda ilungelo elikwesi Sahluko, oko kulisikel' umda makuvusisane nesiqendu 36(1).

24. Okusingqongileyo

Wonk' ubani unelungelo-

- a. lokuba okusingqongileyo kungabi yingozi kwimpilo yakhe okanye kwintlalo-ntle yakhe;
- b. nelokuba okusingqongileyo kukhuselwe, ukuze kuncedakale izizukulwana zangoku nezexesa elizayo, ngokuthi kuwisw' imithetho enokubonelela, kusetyenziswa nezinye iindlela-
 - i) ezithintela ungciliso nokuwohluka kwemeko yokusingqongileyo;
 - ii) ezikhuthaza ulondolozo lwendalo;
 - iii) nolwenza upuhhliso oluqhubeckayo lwemeko yokusingqongileyo nokusetyenziswa kobuncwane bendalo ngoxa zikhuthaza upuhhliso oluthethelelekayo kuqoqosho nakwintlalo.

25. Umhlabo okanye izakhiwo

- 1) Akukho bani onokohluthwa umhlabo okanye isakhiwo ngaphandle kokuba kungomthetho osebenza kuwonkewonke, kwaye akukho mthetho onokuvumela ukohluthwa komhlabo okanye isakhiwo kungabonisananga.
- 2) Umhlabo okanye isakhiwo unokuthathwa kuphela ngokomthetho osebenza kuwonkewonke-
 - a. ngenjongo eyekarhulumente okanye ukuze kuncedakale uluntu;
 - b. xa kuthe kwakho imbuyekezo, exabiso layo, nexesa emayihlawulwe ngalo, nendlela emayihlawulwe ngayo, ekufanele ukuba kuvunyelwane ngabo bachaphazelekayo, kungenjalo igqitywe yinkundla okanye ivunywe yiyo.

- 3) Isixa sembuyekezo nexesha lokuhlawulwa kwayo nendlela yokuhlawulwa kwayo mazibe zezinobulungisa nezingakhalazisiyo, zibonakalisa ukulinga-lingana okungakhalazisiyo phakathi koncedo oluzuzwa luluntu nokuchaphazeleka kwabo bachaphazelekayo, kucingelwa zonke iimeko ezifanelwe kukicingelwa, eziquka-
- a. into osetyenziselwa yona ngoku umhlaba lowo okanye isakhiwo;
 - b. mbali yokuzuzwa kwaloo mhlaba okanye isakhiwo neyokusetyenziswa kwawo okanye kwaso;
 - c. ixabiso laloo mhlaba okanye isakhiwo emarikeni;
 - d. ukuthi urhulumente wenza utyalo-mali kangakanani kuwo okanye kuso ngokuthe ngqo noncedo-mali ekuzuzweni kwaloo mhlaba okanye isakhiwo nokuphuculwa kwawo okanye kwaso okulucedo;
 - e. nenjongo yokuthathwa kwawo okanye kwaso.
- 4) Ngenjongo yokusebenza kwesi siqendu, ukuncedakala koluntu kuquka ukuzibophelela kwsizwe ekuguqulweni kwenkqubo yomhlaba, nakwiinguqu zokubangela ukuba kufikeleleke ngokungakhalazisiyo kubo bonke ubuncwane bendalo boMzantsi-Afrika.
- 5) Urhulumente makathabathe amanyathelo afanelekileyo ngokuwis' imithetho nangezinye iindlela, ngokobuncwane anabo, ukubangela iimeko ezenza ukuba abemi bakwazi ukuba nomhlaba ngokungakhalazisiyo.
- 6) Umntu okanye abantu abalungelo labo lomhlaba okanye isakhiwo lingakhuselekanga ngokwasemthethweni ngenxa yemithetho okanye imikhwa yexesha elidlulileyo ecalula ngokobuhlanga unelungelo okanye banelungelo, kangangoko kuvunyelwa nguMthetho wePalamente, lokubambelela kwilungelo elikhuselekileyo ngokwasemthethweni okanye unelungelo okanye banelungelo lokuba abuyiselwe okanye babuyiselwe okulingana noko alahlekelwe okanye balahlekelwe kuko.
- 7) Umntu okanye abantu abohluthwe umhlaba okanye isakhiwo emva komhla we-19 kuJuni 1913 ngenxa yemithetho okanye imikhwa yexesha elidlulileyo ecalula ngokobuhlanga unelungelo okanye banelungelo kangangoko kuvunyelwa nguMthetho wePalamente ukuba abuyiselwe okanye babuyiselwe loo mhlaba okanye eso

sakhiwo okanye afumane okanye bafumane imbuyekezo elingana noko alahlekelwe kuko okanye balahlekelwe kuko.

- 8) Akukho okutshiro sesi siqendu okunokuthintela urhulumente ekuthabatheren amanyathelo okuwis' umthetho nawolunye uhlobo ukuze kubekho inguqu kwinkqubo yomhlaba namanzi nokunye okuhlobene noko, ngenjongo yokulungisa iziphumo zocalulo lobuhlanga lwexesha elidlulileyo, kodwa ke kuxhomekeke ekubeni nakuphi na okutenxileyo okutshiro sesi siqendu kuyavisitsana nokutshiro sisiqendu 36(1).
- 9) IPalamente mayiwise umthetho ekuthethwe ngawo kwisiqendwana (6).

26. Izindlu

- 1) Wonk' ubani unelungelo lokuba nendlu eyaneleyo.
- 2) Urhulumente makathabathe amanyathelo afanelekileyo ngokuwis' imithetho nangezinye iindlela, ngokobuncwane anabo, ukuze alenze lifezeke ngokuthe ngcembe eli lungelo.
- 3) Akukho mntu onokukhutshwa ekhayeni lakhe, okanye adilizelwe ikhaya lakhe, ngaphandle komylelo wenkundla okhutshwe emva kokuqwalasela zonke iimeko emaziqwalaselwe. Akukho mthetho wepalamente onokuvumela ukukhutshwa ezindlwini kungaboniswananga.

27. Unonophelo lwempilo, ukutya, amanzi nokhuseleko eluntwini

- 1) Wonk' ubani unelungelo lokufumana-
 - a. iinkonzo zokunonophelwa lwempilo, kuquka nononophelo lwempilo olumayela nokuzala;
 - b. ukutya okwaneleyo namanzi; kwakunye
 - c. nokhuseleko eluntwini, kuquka, ukuba akanandlela yokuzondla ngokwakhe nabo baxhomekeke kuye, noncedo olufanelekileyo oluvela eluntwini.
- 2) Urhulumente makathabathe amanyathelo afanelekileyo okuwis' imithethonawezinye iindlela, ngokobuncwane obufumanekayo, ukuze la malungelo afezeke ngokuthe ngcembe.
- 3) Akukho bani onokwalelwa unyango kwimeko yequbuliso.

28. Abantwana

- 1) Wonke umntwana unelungelo-
 - a. lokuba negama nelizwe angummi walo ukususela ekuzalweni;
 - b. lokunonophelwa lusapho okanye lokunonophelwa ngabazali, okanye lokunonophelwa ngenye indlela efanelekileyo xa esusiwe elusatsheni lwakowabo;
 - c. lokufumana ukutya okunesondlo esisisiseko, iikhusi, iinkonzo zokunonophelwa kwempilo ezisisiseko neenkonzo zoonontlalo-ntle;
 - d. lokukhuselwa kwimpatho-mbi, kwintswela-nkathalo, ekuxhatshazweni okanye ekuthotyweni ;
 - e. lokukhuselwa ekuxhatshazweni kwiimeko zasempangelweni;
 - f. lokungayalelw a okanye lokungavunyelwa ukuba enze umsebenzi okanye enze iinkonzo-
 - i) ezingamfanelanga umntu ongumntwana; okanye
 - ii) ezibeka emngciphekweni impilo-ntle yomntwana, imfundu yakhe, impilo yakhe engokwasemzimbeni okanye engokwasengqondweni okanye engokomoya, nokukhula kwakhe;
 - g. lokuba angavalelw a, ngaphandle kokuba alikho elinye icebo elinokuzanya, ekuya kuthi xa kunjalo ke, ukongezelela kumalungelo anawo umntwana ngokwesiqendu 12 nesama-35, umntwana abe nokuvalelw a elona xesha lifutshane lifanelekileyo, kwaye unelungelo-
 - i) lokungadityanisa nabanye abantu abavalelw a yewo ababudala bungaphezu kweminyaka eli-18;
 - ii) nelokupathwa ngendlela ebonisa, kwaye egcinwe kwiimeko eziponisa, ulwazelelelo ngobudala bomntwana;
 - h. lokuba abe negqwetha alinikwa ngurhulumente, ngeendleko zikarhulumente, kumatyala embambano achaphazela umntwana, ukuba ukungabikho kwegqwetha bekuya kubangela intswela bulungisa enkulu;
 - i) nelokungasetyenziswa ngokuthe ngqo kungquzulwano ekuxhotyiweyo kulo, nelokukhuselwa ngamaxesha ongquzulwano ekuxhotyiweyo kulo.

- 2) Ukulungelwa komntwana kokona kubalulekileyo kuwo nawuphi na umcimbi ongomntwana.
- 3) Kwesi siqendu igama elithi “umntwana” lithetha umntu obudala bungaphantsi kweminya eli-18.

29. Imfundo

- 1) Wonk' ubani unelungelo-a.
 - a. lokufumana imfundo esisiseko, kuquka nemfundu yabantu abadala esisiseko;
 - b. nelokufumana imfundo ebhekele phaya, mfundo leyo urhulumente amele ukuba ayenze ifumanekе ngokuthe ncembe ngokuthabath' amanyathelo afanelekileyo.
- 2) Wonk' ubani unelungelo lokufumana imfundo ngolwimi
Iwaseburhulumenteni okanye ngeelwimi ezikhethwe nguye kumaziko emfundo karhulumente apho loo mfundo inokuthi ifumanekе khona. Ukuze urhulumente aqinisekise ukufezekiswa kweli lungelo nokwenziwa kwalo lisebenze, makacinge ngazo zonke iindllela ezifanelekileyo ezizezinye zemfundo, kuquka namaziko afundisa ngolwimi olunye, kucingelwa-a.
 - a. ubulungisa;
 - b. ukusebenziseka;
 - c. nemfuneko yokulungisa iziphumo zemithetho nemikhwa yocalulo lobuhlanga yexesha elidlulileyo.
- 3) Wonk' ubani unelungelo lokwakha amaziko emfundo azimeleyo aze awalondoloze ngeendleko zakhe, kube ngamaziko-a.
 - a. angacaluliyo ngobuhlanga;
 - b. abhalisiwego kurhulumente;
 - c. angehleliyo ngezantsi kumgangatho wamaziko emfundo karhulumente.
- 4) Isiqendwana (3) asikuthinteli ukufunyanwa kwenkxaso-mali karhulumente ngamaziko emfundo azimeleyo.

30. Ulwimi nenkcubeko

Wonk' umntu unelungelo lokusebenzisa ulwimi oluthandwa nguye nokuthabath' inxaxheba kubomi benkcubeko obuthandwa nguye, kodwa akukhobani osebenzisa la malungelo uvumelekileyo ukuwasebenzisa ngendlela engavisisaniyo noko kutshiwo kuMqulu wamaLungelo.

31. Abantu abaphila ngokwenkcubeko yabo, ngokonqulo Iwabo nangokolwimi Iwabo

- 1) Abantu abangabenkcubeko ethile, abangabonqulo oluthile, okanye abangabolwimi oluthile abanakulibandezwa ilungelo, bekunye nabanye abantu boluntu Iwakowabo-
 - a. lokuyonwabela inkcubeko yabo, lokunqula ngokonqulo Iwabo, nelokusebenzisa ulwimi Iwabo;
 - b. nelokusungula imibutho yenkcubeko, yonqulo, neyolwimi, aze umntu azimanye nayo kwaye ayilondoloze, kunye neminye imibutho yoluntu.
- 2) Amalungelo akwisiqendwana (1) akanakusetyenziswa ngendlela engavisisaniyo nokutshiwo kuMqulu wamaLungelo.

32. Ukufulmana ingombolo

- 1) Wonk' ubani unelungelo lokufumana-
 - a. nayiphi na ingombolo ekurhulumente; kunye
 - b. nayo nayiphi na ingombolo ekomnye umntu, efunekayo ukuze umntu akwazi ukusebenzisa okanye ukukhusela amalungelo.
- 2) Makuwiswe umthetho wepalamente wezwelonke ngenjongo yokufezekisa eli lungelo, kwaye loo mthetho unokutsho amanyathelo afanelekileyo amakathatyathwe okwenza lula umthwalo omayela nolawulo nezimali othwelwe ngurhulumente.

33. Ukwensiwa kwezigqibo ngobulungisa

- 1) Wonk' ubani unelungelo lokuba ukwensiwa kwsigqibo ngomcimbi wakhe kube kokusemthethweni, okunokubonelela nokusingethwe ngobulungisa.
- 2) Wonk' ubani omalungelo akhe aye anyhashwa sisigqibo esithathiweyo unelungelo lokunikwa izizathu ezibhaliweyo.

- 3) Makuwiswe umthetho wepalamente wezwelonke ngenjongo yokufezekisa la malungelo, kwaye loo mthetho-
- a. mawuyalele ukuba isigqibo esithatyathiweyo siqwalaselwe ngokutsha yinkundla okanye, apha kufanelekileyo, ngabachopheli-matyala abazimeleyo, abangenamkhethe;
 - b. mawunyanzele urhulumente ukuba afezekise amalungelo akwisiqendwana (1) nesesi-(2); kwaye
 - c. mawukhuthaze ukwenziwa kwezigqibo ngokutyibilikayo.

34. Ukufikelela ezinkundleni

Wonk' ubani unelungelo lokuba nayiphi na imbambano anayo enokusonjululwa ngokusetyenziswa komthetho kwensiwe isigqibo ngayo ekuxoxweni kwetyala okungenamkhethe esidlangularaleni phambi kwenkundla okanye, apha kufanelekileyo, phambi kwabanye abachopheli-matyala abazimeleyo abangenamkethe.

35. Abantu ababanjiweyo, abavalelwego nabamangalelwego

- 1) Wonk' ubani obanjiweyo etyholwa ngokwaphul' umthetho unelungelo-
 - a. lokuthula;
 - b. lokwaziswa ngokukhawuleza-
 - i) ngelungelo lokuthula;
 - ii) angeziphumo zokungathuli;
 - c. lokunganyanzelwa ukuba enze imvumo-tyala enokuthi isetyenziswe kubungqina nxamnye naye;
 - d. lokuziswa phambi kwenkundla kamsinya kangangoko kunokwenzeka, kodwa kungekapheli-
 - i) iiyure ezingama-48 ebanjiwe; okanye
 - ii) imini yokuqala yenkundla emva kokuba kuphele iiyure ezingama-48, ukuba iiyure ezingama-48 ziphela kungezizo iiyure zokusebenza kwenkundla eziqhelekileyo okanye ngemini engeyiyo imini yokusebenza kwenkundla eqhelekileyo;
 - e. lokuba ekuveleni kwakhe kokuqala enkundleni emva kokuba

- ebanjiwe, abekw' ityala okanye aziswe ngesizathu sokuqhubeka kokuvalelwa, kungenjalo akhululwe;
- f. nelokukhululwa ekuvalelweni ukuba ubulungisa buyavuma, ekhululwa ngemiqathango enokubonelela.
- 2) Wonk' ubani ovalelwego, kuquka nebanjiwa ngalinye eligwetyiwego, unelungelo-
- a. lokwaziswa ngokukhawuleza ngesizathu sokuvalelwa;
 - b. lokukhetha igqwetha aze afakan' umlomo nalo, kwaye aziswe ngeli lungelo msinya;
 - c. lokuba anikwe iggwetha ngurhulumente ngeendleko zikarhulumente, ukuba ngokungabi nalo kungakho intswela-bulungisa enkulu, kwaye aziswe ngeli lungelo msinya;
 - d. lokukucel' umngeni ukuba semthethweni kokuvalelwa kwakhe, ekwenza oko buqu phambi kwenkundla, kuze kuthi, ukuba ukuvalelwa oko akukho mthethweni, akhululwe;
 - e. lokuba iimeko avalelwe kuzo zivisisane nokuba nesidima kwakhe, ziquke ubuncinane ukwenza umthambo nokunikwa indawo yokuhlala eyaneleyo, ukutya okunesondlo, into efundwayo nonyango, ngeendleko zikarhulumente;
 - f. nelokuba athethe kwaye atyelelwe-
 - i) liqabane lakhe lomtshato okanye sisinqandamathe;
 - ii) sisihlobo esisondeleyo;
 - iii) ngumluleki okhethwe nguye kwicala lonqulo;
 - iv) nanguggirha okhethwe nguye.
- 3) Wonke umntu omangalelwego unelungelo lokuxoxwa kwetyala okunobulungisa, okuquka ilungelo-
- a. lokwaziswa ngesimangalo esineenkukacha ezaneleyo ukuze akwazi ukusiphendula;
 - b. lokuba nexesha elaneleyo namancedo awaneleyo okulungiselela ukuzithethelela;
 - c. lokuba ityala lakhe liroxwe elubala phambi kwenkundla eqhelekileyo;
 - d. lokuba ukuxoxwa kwetyala lakhe kuqualise kuze kufike esiphelweni

ngaphandle kokulibaziseka okungavakaliyo;

- e. lokuba abekho xa kuxoxwa ityala lakhe;
- f. lokuba azikhethelo igqwetha aze amelwe lilo, kwaye aziswe ngeli lungelo msinya;
- g. lokuba anikwe igqwetha ngurhulumente ngeendaleko zikarhulumente, ukuba ngokungalinika kungakho intswela-bulungisa enkulu, kwaye aziswe ngeli lungelo msinya;
- h. lokuba athathwe njengomntu omsulwa, athule, anganiki bungqina ekuxoxweni kwetyala;
- i. lokuba anike ubungqina kwaye abuphikise ubungqina obunikiwego;
- j. lokuba anganyanzelwa ukunika ubungqina obumdyobha ngetyala;
- k. lokuba liroxwe ityala lakhe ngolwimi aluqondayo, kungenjalo ukuba akunakwenzeka oko, atolikelwe ngolo lwimi aluqondayo kwelotyala;
- l. lokuba angafunyaniswa enetyala lokwenza isenzo okanye lokungenzi isenzo esasingekuko ukwaphul' umthetho ngokomthetho welizwe okanye ngokomthetho wamazwe ngamazwe ngexesha awasenza ngalo okanye ngexesha angazange asenze ngalo;
- m. lokuba angaxoisw' ityala ngokwaphul' umthetho mayela nokwenza okanye ukungenzi isenzo awayesele efunyaniswe engenatyala okanye awayesele efunyaniswe enetyala ngaso;
- n. lokuba afumane esona sincinane kwizohlwayo ezitshiwo ngumthetho ukuba isohlwayo esifunwa ngumthetho sokwaphul' umthetho siye satshintshwa kwixesha eliphakathi kokwaphula kwakhe umthetho nokugwetywa kwakhe;
- o. nelokubhenela kwinkundla engentla okanye ityala lakhe liqwalaselwe ngokutsha yiyo.

4) Nanini na xa esi siqendu sifuna ukuba umntu anikwe ingcombolo, makayinikwe loo ngombolo ngolwimi aluqondayo.

5) Ubungqina obufunyenwe ngendlela enyhasha ilungelo elikuMqulu wamaLungelo mabungamkelwa ukuba ukwamkelwa kwabo kuya

kukwenza ukuxoxwa kwetyala kube kokungenabulungisa okanye kube nobungozi ekusingathweni kobulungisa.

36. *Ukusikelwa umda kwamalungelo*

- 1) Amalungelo akuMqulu wamaLungelo anokusikelwa umda kuphela ngokomthetho osebenza kuwonkewonke, kodwa ukusikelwa umda oko kube kokunokubonelela nokuthethelelekayo kuluntu olukhululekileyo lwentando yesinini oluhlonela sokuba ngumntu, ukulingana nenkululeko, kuvelelwa zonke iinkalo emazivelelwe, eziquka-a.
 - a. ubunjani belungelo;
 - b. ukubaluleka kwenjongo yokusikelwa umda;
 - c. ubunjani bokusikelwa umda nobungakanani bako;
 - d. ikhonkco phakathi kokusikelwa umda nenjongo yako;
 - e. nokusetyenziswa kweyona ndlela ingcathu yokuyifeza loo njongo.
- 2) Ngaphandle kokuba kwensiwa ngendlela exelwe kwisiqendwana (1) okanye exelwe kwezinye iinxalenye zoMgaqo-siseko, akukho mthetho onokuthi ulisikel' umda ilungelo elikuMgaqo-siseko.

37. *Iimeko zequbuliso*

- 1) Kunokwenziwa isibhengezo sobukho bemeko yequbuliso kuphela ngokoMthetho wePalamente, kunjalonje kuphela xa-a.
 - a. ubomi besizwe busongelwa yimfazwe, luhlaselo, luvukelo, sisiphithiphithi, yintlekele yendalo okanye yenye imeko yequbuliso echaphazela uluntu; kube
 - b. ukwenziwa kjesibhengezo kuyimfuneko ukuze kubuye kubekho uxolo nocwangco.
- 2) Ukubhengeza kwemeko yequbuliso, kune nawo nawuphi na umthetho wepalamente owisiweyo okanye elinye inyathelo elithathyathiweyo elisisiphumo sokwenziwa kweso sibhengezo, kunokuqualisa ukusebenza kuphela-a.
 - a. kwixesha elisengaphambili;

- b. ixesha elingengaphezulu kweentsuku ezingama-21 ukususela kumhla wokwenziwa kwsibhengezo, ngaphandle kokuba iNdlu yoWiso-mthetho igqiba kwelokuba ilolule ixesha lesibhengezo. INdlu inokulolula ixesha lesibhengezo semeko yequbuliso ixesha elingengaphezulu kweenyanga ezintathu ngexesha. Ukolulwa kokuqala kwemeko yequbuliso makube ngesigqibo esamkelwe ngevoti ekuxhasayo oko yesinini samalungu eNdlu. Nakuphi na ukolulwa okulandelayo emva koko makube ngesigqibo esamkelwe ngevoti ekuxhasayo oko yamalungu eNdlu angama-60 ekhulwini ubuncinane. Isiggibo esingokwesi siqendu sinokwamkelwa kuphela emva kwengxoxo yasesidlangulareni kwiNdlu.
- 3) Nayiphi na inkundla enegunya lokukwenza oko inokuthath' isiggibo ngokufaneleka-
- kwesibhengezo semeko yequbuliso;
 - ngokolulwa kwexesha lesibhengezo semeko yequbuliso; okanye
 - kwawo nawuphi na umthetho wepalamente owisiweyo, okanye elinye inyathelo elithatyathiweyo ngenxa yokubhengezwa kwemeko yequbuliso.
- 4) Nawuphi na umthetho wepalamente owiswe ngenxa yokubhengezwa kwemeko yequbuliso unokutenxa kuMqlu wamaLungelo kuphela ngokwenqanaba-
- elifunwa ngokungqongqo yimeko yequbuliso leyo;
 - lokuba umthetho wepalamente-
- uvisisane neembopheleleko iRiphablikhi enazo ngokomthetho wamazwe ngamazwe osebenza kwiimeko zequbuliso;
 - uvisisane nesiqendwana (5); kwaye
 - upapashwe kuShicilelo-Mithetho lukaRhulumente (Government Gazette) lwezwelonke msinya kangangoko kunokwenzeka emva kokuba uwisiwe.

- 5) Akukho Mthetho wePalamente ogunyaza ukubhengezwa kwemeko yequbuliso, kwaye akukho mthetho wepalamente owisiweyo okanye elinye inyathelo elithatyathwe ngenxa yesibhengezo, onokuthi uvumele okanye ugunyaze-
- a. ukukhululwa kukarhulumente okanye nawuphi na omnye umntu ekuphendulen i ngeziphumo zesenko esingekho mthethweni;
 - b. ukuphambuka kokutshiwo sesi siqendu; okanye
 - c. ukuphambuka kwisiqendu esikhankanywe kumhlathi wesiCangca samaLungelo Angenakunyhashwa, ngokwenqanaba eliboniswe kweso siqendu kumhlathi 3 wesiCangca.

ISICANGCA SAMALUNGELO ANGENAKUNYHASHWA

ISIQENDU	UMXHOLO KWESO SIQENDU	UBUNGAKANANI BOKUKHUSELEKA KWELUNGELO
9	Ukulingana	Ngokumayela nocalulo olungenabulungisa, kuperha xa lulolobuhlanga, lulolwebala, lulolobuzwe okanye lulolwemvelaphi ngokwasentlalweni, lulolwesondo, lulolonqulo okanye ololwimi.
10	Sokuba Ngumntu	Ngokupheleleyo
11	Ubomi	Ngokupheleleyo
12	Inkululeko-nokukhusaleka komntu	Ngokumayela nesiqendwana (1)(d) no-(e) no-2(c).
13	Ubukhoboka nomsebenzi wesinyanzelo	Ngokumayela nobukhoboka
28	Abantwana	Ngokumayela: <ul style="list-style-type: none"> • nesiqendwana (1)(d) no-(e); • namalungelo akwisiqendwana (i) neses-i-(ii) kwisiqendwana (1)(g); kunye • nesiqendwana (1)(i) ngokumayela nabantwana abaminyaka ili-15 nangaphantsi.
35	abantu ababanjiweyo, abavalelwego-nabamangalelwego	Ngokumayela: <ul style="list-style-type: none"> • nesiqendwana (1)(a), (b) no-(c) no-(2)(d); • namalungelo akwisiqendu (a) ukuya ku-(o) kwisiqendwana (3), ngaphandle kwesiqendu (d); • nesiqendwana (4); • nesiqendwana (5) ngokumayela nokungamelwa kobungqina ukuba ukwamkelwa kwabo kuya kukwenza ukuxoxwa kwetyala kube kokungenabulungisa.

- 6) Nanini na xa umntu evalelwe akwaxoxwa tyala ngenxa yokunyhashwa kwamalungelo okuzalwa kukubhengeza kwemeko yongxamiseko, makunikelw' ingqalelo kwimiqathango elandelayo:
- a. makuqhagamshelwane msinya kangangoko kunokwenzeka nelungu losapho elingumntu omdala okanye umhlobo womntu ovalelweyo, aziswe into yokuba umntu ovalelweyo uvalelwe;
 - b. makupapashwe isaziso kuShicilelo-Mithetho LukaRhulumente lwezwelonke zingaphelanga iintsuku ezintlanu evalelwe umntu lowo, kuxelwe igama lomntu ovalelweyo nendawo avalelwe kuyo, kuxelwe nenyathelo lemeko yequbuliso avalelwe ngenxa yalo loo mntu;
 - c. umntu ovalelweyo makavunyelwe ukuba azikhethele ugqirha aze atyelelwe nguye nangaliphi na ixesha elifanelekileyo;
 - d. umntu ovalelweyo makavunyelwe ukuba azikhethele igqwetha, aze atyelelwe liro nangaliphi na ixesha elifanelekileyo;
 - e. inkundla mayikuqwalasele ngokutsha ukuvalelwa kwakhe msinya kangangoko kunokwenzeka, kodwa kungadanga kuphele iintsuku ezili-10 emva komhla awavalelwa ngawo umntu, kwaye inkundla mayimkhulule umntu ovalelweyo ngaphandle kokuba kuyimfuneko ukumgcina evalelwe ukuze kubuye kubekho uxolo nocwangco;
 - f. mntu ovalelweyo ongakhululwanga xa kuqwalaselwa ngokutsha ukuvalelwa kwakhe ngokwesiqendu (e), okanye ongakhululwanga xa kuqwalaselwa ngokutsha ukuvalelwa kwakhe ngokwesi siqendu, unokwenza isicelo enkundleni sokunye kwakhona ukuqwalaselwa ngokutsha kokuvalelwa kwakhe nangaliphi na ixesha emva kokuba ziphelile iintsuku ezili-10 ukususela ekuqwalaselweni ngokutsha kwangaphambili, kwaye inkundla mayimkhulule umntu lowo uvalelweyo ngaphandle kokuba kuseyimfuneko ukumgcina evalelwe ukuze kubuye kubekho uxolo nocwangco;
 - g. umntu ovalelweyo makavunyelwe ukuba avele buqu phambi kwayo nayiphi na inkundla eqwalaselwa ukuvalelwa kwakhe, amelwe ligqwetha koko kuqwalaselwa, kwaye atsho afuna ukukutsho ngokuqhube ka kwakhe evalelwe;

- h. urhulumente makanike inkundla izizathu ezibhaliwego ezikwenza kuthetheleleke ukuqhubeka kwakhe evalelwe, kwaye makanike umntu ovalelweyo ikopi yezo zizathu ubuncinane kusasele iintsuku ezimbini ngaphambi kokuba inkundla ikuqwalaselae ngokutsha ukuvalelwa kwakhe.
- 7) Ukuba inkundla iyamkhulula umntu ovalelweyo, loo mntu akanakuvallewa kwakhona ngezizathu ezifanayo ngaphandle kokuba urhulumente uqale abonise inkundla isizathu esivakalayo sokumvaleda ngokutsha.
- 8) Isiqendwana (6) nese-(7) azisebenzi kubantu abangengabo abaseMzantsi-Afrika nabavalelwe ngenxa yongquzulwano Iwamazwe ngamazwe kuxhotyiwe. Ndaweni yoko, urhulumente makenze okufunwa yimigaqo enkqamangela iRiphablikhi phantsi komthetho wamazwe ngamazwe wokuboniswa kobuntu ngokumayela nokuvallewa kwabo bantu.

38. *Ukunyanzeliswa kwamalungelo*

Nabani na odweliswe kwesi siqendu unelungelo lokuya kwinkundla enegunya elifanelekileyo, esithi ilungelo elikuMqulu wamaLungelo linyhashiwe okanye lisemngciphekweni wokunyhashwa, inokuthi ke inkundla yenzencedo olufunekayo, oluquka ukuvakaliswa kwamalungelo. Abantu abanokuthi baye enkundleni ngaba-

- a. nabani na omele isiqu sakhe;
- b. nabani na omele omnye umntu ongakwaziyo yena ukuzimela;
- c. nabani na olilungu leqela elithile labantu okanye omela elo qela ukuba alincede;
- d. nabani na ofuna ukunceda uluntu;
- e. nombutho ofuna ukunceda amalungu awo.

39. *Ukuchazwa kwentsingiselo yoMqulu wamaLungelo*

- 1) Xa ichaza intsingiselo yoMqulu wamaLungelo, inkundla, abachopheli-matyala okanye abachopheli-mcimbi –
 - a. mayikhuthaze izithethe ezisisiseko zoluntu olukhululekileyo lwentando yesininzi oluxabise isidima sokuba ngumntu, ukulingana nenkululeko;
 - b. mayiqwalasele umthetho wamazwe ngamazwe; kananjalo
 - c. isenokuthi iqwalasele umthetho welinye ilizwe.
- 2) Xa zichaza intsingiselo yaho nawuphi na umthetho wepalamente, naxa ziphucula umthetho ongabhalwanga phantsi okanye umthetho wakwantu, zonke iinkundla, abachopheli-matyala okanye abachopheli-mcimbi mabakhuthaze umoya nenjongo yoMqulu wamaLungelo.
- 3) UMqulu wamaLungelo awubukhanyeli ubukho bamanye amalungelo okanye iinkululeko ezivunywayo ngumthetho ongabhalwanga phantsi okanye ezifumaneka kuwo, nakumthetho wakwantu okanye kumthetho wepalamente, kuphela nje xa evisisana noMqulu wamaLungelo.





CCAC

30 YEARS OF DEMOCRACY - 2024
30 YEARS OF THE CCAC - 2025
30 YEARS OF THE CONSTITUTION - 2026

🌐 ccac.concourtrust.org.za
⌚ @concourt_art
𝕏 @concourt_art